



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Assam sorkari ita 3 tsungda nisung
ajak nem vaccine agujang: Akhil Gogoi

Pakistan Opposition lenir Shehbaz
no-fly list nung zungoksemogo

VOL. XVIII NO. 213 (ADOK 213) DIMAPUR

SANGTENNÜ (TUESDAY)

MONUPII (MAY) 18, 2021

₹ 5.00

COVID-19 Nagaland: Nisung 273 dak putet; 7 asü

Kohima, May 17, 2021 (TYO): Hombarnü Nagaland nung nisung 273 dak COVID-19 aliba putet aser parnok zungsema nisung ajak agi 18,349 kumogo.

"Tanü nisung 273 dak COVID-19 putet. Parnokji Kohima nung 119, Mon nung 61, Dimapur nung 58, Tuensang nung 10, Wokha nung 6, Mokokchung, Kiphire o Zunheboto nung pungugu (5) aser Peren nung 4 lir" ta Health & Family Welfare Minister, S Pangnyu Phom-i metetdaksü.

"Maneni, tanü COVID-19 puteta alir nisung 104 taneptsü angu. Parnokji Dimapur nung 70, Kohima nung 25, Peren nung 5, Mokokchung nung 3 aser Mon nung 1 lir" ta paisa ashi.

Nisung 18,349 rongnungi 13,299 taneptsü nguogo aser tang 4,253 anepaludar, ta Minister Pangnyu-isa shisem.

"Tang anepaludtem rongnung nisung 180 dak shirangba yimya terara lir, 78 tera timtema oxygen agir, 79 kanga shiranga oxygen agidar, 23 ICU nung lir aser 17 ventilator nung anepaludar. Nisung 3,876

dakbo shirangba yimya mali," ta State Nodal Officer Dr Nyanthung Kikon-i ashi.

Tanü nisung 7 asüba zungsema tasür ajak agi 216 kumogo saka nisung 11 bo tanga timtem ajanga asü, ta paisa ashi.

Tanü tashi nung COVID-19 alitsü akok ta temolung melemi bilemba sample 1,74,303 tendangogo. RT-PCR ajanga 84,437, TrueNat ajanga 51,896 aser Rapid Antigen Test ajanga 37,970 tendang, ta Dr Kikon-isa shisem.

Külen, Deobar tashi nung Nagaland nung nisung 1,86,050 nem COVID-19 vaccine dose 2,39,817 agütsüogo, ta State Immunization Officer Dr Ritu Thurr-ia metetdaksü.

Vaccine agirtemji frontline workers 54,802, healthcare workers 15,254 aser arishi kum 45 ser temapur 1,15,994 lir.

Nisung 53,767-i vaccine indang dose anaprong agiogo. Parnokji front-line workers 27,820, healthcare workers 10,152 aser arishi kum 45 ser temapur 15 lir, ta Dr Thurr-isa ashi.

HFW-i Kohima & Dimapur nung temolung agütsür Tanü nungi NHAK COVID-19 hospital akümer

Kohima, May 17, 2021 (TYO): Kohima aser Dimapur district tem nung COVID-19 kanga puteter aser iba jagi Health department-i district ana nung temolung kanga agütsür.

"Kohima nung nisung aika dak COVID-19 putetba agi asing (May 18) nungi Naga Hospital Authority Kohima (NHAK) ya 'Covid-19 Hospital' akümtsü" ta Principal Director Dr Neikhrielie Khimiao-i ashi.

Yaküim COVID-19 wara nung amshiba ama nija mozü ki ajak dang general patients (medical mesüra surgical) anepalutsü mepishio. Kohima nung aser temeket aliba mozü ki ajak nung public-i teyari nungdakba ama yaritsüla, ta pai metetdaksü.

"Dimapur district nung tang tashibo tensa aziüoka lir saka nungdak dang süra makeshift hospitals yanglutsü atema onok renema lir," ta Dr Khimiao-isa ashi.

Kohima nung ama tanga district tem nunga PHCs, CHCs aser Sub-Centres ajak nung medical care services agütsüsü mepishio, ta paisa shisem.

Nija mozü kitem nung sen aika adokba atema osangbenertemi asungdangdang "yaküm inyakba ama sorkari tetuyuba kar agütsüsü.

Taoba mapang sorkari Ayushman Bharat Scheme amshitsü aser reimbursement asütsü tetuyubatem agüja liasü" ta Principal Director-i langzü.

Tesüiba hopta ishika mozü ki nung shiranga asür ajak COVID-19 agi asü ta osangtem prokshio saka tasür ajakji COVID-19 agi asüba masü, ta paisa shisem.

Nagaland nung COVID-19 kanga menatapa aoba nung ajemdaker department-i state ajanga lockdown asüba atsülangtsü shidangtsü asü masü ta osangbenertemi asungdangdang "lockdown atsülangtsü baji Chief Secretary-i aniba COVID-19 War Room ajanga dang lemtetsü" ta Dr Khimiao-i ashi.

Tapi agi nisung balala indang sample bendena COVID-19 tendangtsü atema Rapid Antigen Test (RAT) tajungtuba lir kechiyong BSL aser TrueNat nung mapang talila agir. Tanü tashi nung department-i RAT kits 8000 lemogo aser Deobarnü Centre nungi anguba RAT kits 15,000 alemtsü, ta paisa metetdaksü.

Department-i Centre dang ano RAT kits 15,000 nungdakba shio saka aser iba atema telangzüba mangu lir, ta Dr Khimiao-isa ashi.

Train taktangtem Covid Care Center ama amshitsü

Dimapur, May 17, 2021 (TYO): Hombarnü Y. Kikheto Sema (IAS), ADC Dimapur Atokhe Aye aser Deputy CMO Dr. Antony nungertemi Railway station Dimapur semdanga ketdangsurtem aser Railway Medical Services zungsemtem den senden ka amen.

Tanü parnokji train taktangtem repringdanga senzudang Covid Hospital ama amshitsü makok ta telemteba agi.

Tesüiba mapanga District Task Force (DTF)-ia Railway station semdangdang train taktangtem Covid hospital ama amshitsü majung ta ajiteta liasü aser iba jagi tanü Team Dimapur-i taoba mapang DTF-i lemtetba ama Covid Care

Center ama dang amshitsü telemteba agiogo.

Tang Dimapur kübok Chumukedima CCC nung Covid agi shirangertem anepalutsü atema yipden antinga lir anungji railway station nung lapokba Covid Care Center nung nungdak adokdang tangalen nungi aayang arurtem anioka anepalutsü telemteba agi.

Train taktang nung CCC lapok nunga SOP lateta aliba ama shiranger 160 masü saka 80 dang anepalutetsü. Train taktang nung yua aliba oxygen cylinder agi mepertsü saka iba atema Dimapur medical team aser Railway Medical Services tsungda teti amalitepa inyaker, ta Kikheto Sema-i ashi.

Nagaland nung mezungbuba PSA oxygen generation plant lapokogo



May 17, 2021 nü NHAK nung lapokba PSA Plant nung Health & Family Welfare (HFW) Minister Pangnyu Phom aser tangartem agiba noksa angur. (Kohima, May 17)

Kohima, May 17, 2021 (TYO): Hombarnü Nagaland nung mezungbuba Pressure Swing Adsorption (PSA) oxygen generation plant lapokogo.

Iba PSA Plant indang tashi 300 LPM lir aser Naga Hospital Authority Kohima (NHAK) nung lapokogo.

Hombarnü Health & Family Welfare Minister, S Pangnyu Phom-i PSA plant lapoktsüdang "Iba plant nung medical oxygen 300 litre per minute (LPM) yanglutetsü. Iba anogo ya Nagaland nung alirtem atema tongtipang anogo ka lir" ta ashi.

"Linük aser talisa Nagaland nung nisung aika dak Covid puteta aruba mapang ka nung Oxygen kanga nungdaka kumogo aser iba ama mapang ka nung PSA Plant

ajanga mozü kidang oxygen nungdakba peritsütsü," ta Minister Pangnyu-isa ashi.

"Ministry of Health and Family Welfare ajanga PM CARES kübok Nagaland nem PSA Plant asem lemzütsüogo. Iba plant yangluba sülen FARE Labs, Gurgaon dangi sample yok aser parnok nungi medical oxygen 95.37% tajung ta bushitetba kuli nguogo. Iba ya Standard Quality lir aser Medical nungdak nung amshitettsü" ta paisa shisem.

District Hospital Dimapur nunga PSA Plant renemogo saka sample test ano mangu lir. Dimapur nung plant indang tashiji 200 LPM capacity lir, ta Minister-isa metetdaksü.

IMDH, Mokokchung nung 200 LPM capacity indang plant

yangludar, ta Pangnyu-isa shisem.

Maneni, UNDP-i teyari agüja District Hospital Tuensang aser Phek nung aser UNICEF-i teyari agüja District Hospital Mon, Zunheboto, Wokha, Peren, Kiphire aser Longleng nung PSA Oxygen Generation Plant yanglutsü.

Health Ministry dangi Noklak nunga PSA Plant yanglutsü atema asungdangogo, ta Minister Pangnyu-isa metetdaksü.

"Maneni, Nagaland nung nisung aika dak Covid putetba atema NHAK aser CIHSR Dimapur nung 1000 LPM PSA Plant ana yanglutsü atema Health Ministry dang asungdangogo" ta paisa ashi.

"District Hospital ajak nung PSA Plant yangluba den külemi district ajak nem Oxygen Concentrators aser Oxygen Cylinders agütsüba ajanga COVID-19 wara nung Oxygen nungdakba peritsü" ta Pangnyu-isa metetdaksü.

Nagaland state sorkar tenung nung Minister-isa Ministry of Health & Family Welfare, UNDP aser UNICEF dang pelaba metetdaksü.

Iba sentong nung Urban Development & Municipal Affairs Advisor Dr Neikiesalie Kire, HFW Principal Director Dr Neikhrielie Michiao, doctor tem aser ketdangsur aika aden.

Nagaland nung arishi kum 18-44 nem COVID-19 vaccine agütsür Vaccine agütsüsü atema tejak merepranger

Kohima, May 17, 2021 (TYO): Hombarnü Health & Family Welfare (HFW) Minister S Pangnyu Phom-i Nagaland nung arishi kum 18 nungi 44 tsungda alirtem asoshi COVID-19 vaccine agütsüba maparen tenzütsüogo.

Tanü Minister Pangnyu-i Directorate of Health and Family Welfare nung iba maparen tenzütsü.

Ministry of HFW-i lemzüka ama sen crore 1.15 den timba agütsüba sülen Nagaland-i COVISHIELD Vaccine dose 36,580 nguogo. Onoki vaccine talila meshi saka iba atema tashi kecha mali, ta pai ashi.

Jilattem nung temolung agüja arishi kum 18-44 atema Covid-19 Vaccination Centres (CVC) lapokogo. District ajak nung nungtsüng yongsük aser menateptsü akok ta asüba asadanger vaccine lemzütsüogo, ta paisa metetdaksü.

Taruba hopta atema booking asütsü osang metetdaksütsü aser nisung ajaki COWIN portal nung register asütsüla, ta paisa ashi.

"COVID-19 ya taintem dak mesüra temang nung timtem alirtem dak atongba tashidak ka masü kumogo. Lanur aika dak COVID-19 puteter aser iba anema raratsü asoshi tajungtibaji vaccine lir" ta Pangnyu-isa ashi.

"Temang nung diabetes, hypertension amala timtem aliba arishi kum 45 ser temapur ajaki tekaratiba nung vaccine agütsü ayongzüker" ta Minister-isa metetdaksü.

Nagaland nung arishi kum 18

nungi 44 tsungda alirtem asoshi COVID-19 vaccine agütsü meranger saka vaccination slot mangur. Iba jagi nisung aikati Health & Family Welfare department-i maparen tim mesüi inyaker aser tejak repringa tenung agizüker ta bilemer.

Nagaland nung arishi kum 18 nungi 44 tsungda nisung lakh 8 tema lir ta asadangteta lir. Ministry of HFW-i lemzütsüba ama state sorkari Rs 1,15,74,00 agütsür Covishield indang dose 38,580 nguogo. Vaccine ji May 12 nü atong aser nungtsüng yongsük nung ajemdaker district ajak nem lemzütsüogo.

"Nagaland nung arishi kum 18 nungi 44 tsungda alirtem asoshi vaccine dose lakh 4 meshi saka ibaji shilem lemsar ang angutsü. Iba jagi taruba vaccination anogo meshitet" ta Dr Thurr-i ashi.

Health department ketdangsurtemi pei kinungertem nem mezung maongka agütsür ta nisungtemi jembiba atema Dr Thurr-i "arishi kum 18 nungi 44 tsungda alirtemi online ajanga dang registration aser booking asür aser ibaji UNDP ajanga ketdangsur, anungji department-i iba nung tim masüba meinyaktetsü" ta ashi.

District balala nem vaccine lemzütsüba: Dimapur - 6500, Kohima - 5,080, Mon - 4,000, Tuensang - 3,500, Mokokchung -

3,500, Wokha - 3,000, Zunheboto - 3,000, Phek - 3,000, Peren 2,000, Kiphire - 1,500 aser Longleng - 1,500.

"Nisungtemi CoWIN portal mesüra Arogya Setu App nung mezung register asütsüla. Iba nung tim masüba mesüra tejak repringa inyaksü makok kechiyong vaccine slots ji ajak atema lapoka lir. Iba nung advance booking asütsü tamakoktsü" ta ketdangsur katia osangbener dang ashi.

Iba portal ya yimsüsürtem mesüra ketdangsurtemi masü saka technology amshitsü mongintemi dang repringer, ta paisa ashi.

"Health unit shia nung vaccine slot alibaji osangkaketem dena yimjak nung metetdaksütsü aser CoWIN portal ya public domain ka asünung shingaija iba nung teka aitsü makok" ta health ketdangsurisa shisem.

VACCINEAGIRTEM DAK TIMTEM TULUMADOK:

Linük den külemi Nagaland nunga January 16, 2021 nungi Covid-19 vaccine agütsü tenzüker tanü tashi nung vaccine agir dak temang nung timtem adokba mesüra taküm samaba atalokdanga mali, ta Dr Ritu Thurr-i ashi.

January 16 nungi tenzüker vaccine agüja arudang nisung 38 dak dang temang nung timtem tila kar adok, ta paisa metetdaksü.

"Tang Nagaland ket nung Centre sorkari angati agütsüba vaccine indang dose 92,000 shi anunga lir aser tan hopta ano dose 14,550 tonga arutsü," ta Dr Thurr-isa shisem.

Tanü nai tera indokang aser asüng jenti arotsü: Kikheto Sema



Y.Kikheto Sema meina Commissioner Police Dimapur, ADC aser Dy.CMO Dimapur nungertemi May 17, 2021 nü Chumukedima nung Deputy Commissioner Office tasenba nung Covid Care Center lapoka aliba semdangba mapang tangokba noksa ka yangi angur.

Dimapur, Monupii/May 17 (TYO): Dimapur nung COVID-19 dak sendakba maparen inyaksangshi ketdangsütsü atema Nodal Officer shimteta alisang, Y. Kikheto Sema, IAS den Commissioner Police Dimapur, Rothihu Tetseo IPS; ADC Dimapur, Athoke Aye aser Dy.CMO Dimapur, Dr. Antoly nungertemi May 17, 2021 nü New DC Complex, Chumukedima nung Covid Care Center (CCC) semdanga liasü.

Naga nunger densema makamaiter aayanger timba süir yangji COVID-19 agi menepa alir nisung 33 timtemba angazüka, Kikheto Sema-i Arogo/NGO aser lokti tentet balala dang anogo ishika atema danga parnok nem chiyongtsü anepalua agüjang, ta ayongzüka liasü, shirnok home isolation atema takdang peria mali aser Naga nunger tenzükba kilirtem lir.

"Teraka indokang aser aika meyipa angutsü, aser mission mapa ama indoktsü atema ibai tetemsü lir," ta Kikheto-i ashi.

"Kechiba mapang shidak nung meindoker? Sarasadem kisüing agi meyaritsü saka sarasadem den mapa alinung dang tali moatsütsü," ta pai ashi.

Team Dimapur yangi CCC nung alir shia nem anogoshi sen 350 agütsür, aser kari danga yaritsü molunga lira District Task Force Dimapur den tongtepratepsü akok.

Social distancing yimya amshia Kikheto-i CCC nung COVID-19 positive pur molung

süngzüktsü aser Tsüingren nenok den lir, ta ashi.

Kikheto Sema-i anir Team Dimapur ajanga Medziphema Community Health Center semdang, kong Advisor Zhaleo Rio-a nüburttem nem awareness agüja mozü agitsü ajungshia liasü.

Advisor Zhaleo-i iba ama mapa tajung inyakba atema Kikheto Sema-i tenüngsang agütsü aser Dimapur nung khuret tulu abenba atema ketdangsür nem osang sangoktsütsü ajungshia liasü.

Dimapur ya Nagaland atema süngkum ka amai asünung, Nagaland-i aiterem mita repranger COVID-19 positive putetertem Dimapur nung ayur aser negative adokertem pei ki bushia yoker, ta pai rateta ashi.

Anungji state nung COVID-19 positive cases shilem 61 ya Dimapur nung lir aser coronavirus kisüing masü, Dimapur nung merila aser tzüngsang-mopung den rarar, ta Sema-i ashi.

Pai nüburttem dang COVID-19 mozü asoshi olulu prokshiba mangashi yutsür mozü ya agitsü ayongzüka liasü. Mozü ya majung asübo kechiba Ato Kilonser, Chief Minister, yimten yimsüsürttem aser nia agitsü? ta Kikheto-i asüngdang.

Medziphema CHC inyakim nung temolung süa, Health Center tajungtiba rongnung ka lir, ta pai ashi aser health worker tem dang COVID-19 den raratsü asoshi renemshia alitsü ayongzüka.

Dimapur (2300 positive

cases) den medemdangra Medziphema nung COVID-19 cases ya kanga ajema lir (80 cases) saka tajemtiba agi COVID-19 anepalutsü atema yipten 15 bo renema alitsüla, ta paisa ashi.

Parnoki Niuland semdangba mapang ADC Niuland aser health worker den sensaksema Niuland nung COVID cases ajema aliba atema pelaba lemsatepa liasü.

Ajisüaka yangji sample survey magi aliba angazüka Nodal Officer for COVID-19 ajanga Deputy CMO Dimapur dang tekeratiba nung yangji sample survey agitsü ajungshia liasü.

Pai yangji alirtem dang tongtipang nungdak ka mesüra Dimapur-i marutsüla, ta ajungshi aser menüngdakba nung Dimapur-i arua makazüi SOP shidak amshia alo aser mapai aotsü ajungshi.

Network connectivity majungba ajanga Niuland nung aliba nüburttem COVID-19 mozü agitsü atema online nung tenüng zülüoktsü makoker ta angazüka, Kikheto-i yimdaklir nem online registration magiyonga mozü agütsüdaktsütsü atema temaba ketdangsürttem den jembitsü, ta shia liasü.

Frontline worker, talisa health worker tem meshidaki amshiba metet nungbo temerenshi tulu alitsü aser nüburttemi parnok atema maneni sarasademtsütsüla, ta Nodal Officer Dimapur for COVID-19, Kikheto Sema-i nüburttem dang ashi.

NSCN/GPRN ajanga asükhu lemsatep

Dimapur, Monupii/May 17 (TYO): General Headquarters (GHq), Naga Army nungi Colonel Imtimeren Jamir (Naga Army No. KL-20568) anojungi May 16, 2021 nü asüba asoshi Government of the People's Republic of Nagaland (GPRN) ajanga mang ayimer, ta sangdong ka ajanga ashi. Pa ya Ao Region kübok Mangmetong yimdak nungi liasü aser Naga linük tenzüktsü asoshi April 4,

1988 nung tenüng zülüoka liasü. Pa tasünü tashi linük meimba molungsentüsü dener Naga linük manokshie tenzükogo. Pa asüba ajanga tawa adokba kanga jangja metettsü aser asüngtsü tasak asütsü. Pai Naga lima atema pei agitsü mebilemi tenzükba atema pa tenüng Naga nunger puti otsü nung alitsü aser Naga nungeri pa kodanga mamadoktsü, ta sangdong ajanga ashi.

Pai Naga lima tenzükba

asoshi konang tetushi agüja Office of the Longvibu, Naga Army ajanga May 17, 2021 nü pa nem Brigadier rank agütsür.

NSCN/GPRN ajanga Asür Brigadier Imtimeren Jamir kinungertem den asükhu lemsateper. Tsüingremi par kinunger nem anisüngzük agüjangma aser pa tanüla teti tatem maka tesunep nung anisüngzükjang ta sarasademtsür, ta sangdong ajanga ashi.

Kija aser lokti balalai C. Sashi Naga asükhu lemsatep

Dimapur, Monupii/May 17 (TYO): Anojungi Eastern Nagaland Peoples' Organization (ENPO) tir C. Sashi Naga tanep (May 17, 2021) CIHSR, Dimapur nung asüba osang angashia aoksar aser mang ayimer, ta Nagaland Tribes Council (NTC) tir Toniho Tepthomi aser tongti zülur Nribemo Ngullie nati sangdong ka nung ashi.

Nübur tenzükba wadang nung takotet aser tejen nübür, Sashi Naga ya taoba mapanga ENPO nung jenjang balala nung tenzükba liasü, aser pa asüba agi ENPO telungzük nung kisüing masü saka Naga nunger ajunga akoksar, ta sangdong ajanga ashi.

NTC ajanga ENPO aser mangyimer kibong den asükhu lemsateper aser Tulusang Tsüingremi parnok nem tashi tasen agüjang, ta sarasademtsür, ta sangdong ajanga ashi.

State BJP tir aser Minister, Higher Education & Tribal Affairs, Temjen Imna Along-ia sangdong ka nung, Dimapur nung tanep ENPO tir, C. Sashi Naga asüba onsang angazüka temolung khurema bilemer, ta ashi.

C. Sashi Naga ya tasütait nübu ka liasü ta ajaki meteta lir, aser pa dak nübür anitsü sempet tajung aliba ajaki jengja meteta lir. Lenir tajungtem rongnung ka ta züngshia alisang, C. Sashi Naga tangatetba aser shisatsü ajanga loktiliba nung kongshia liasü, ta Minister Imna Along-i ashi.

Mangatetep alidak tesunep aser tangatetep lidaktsütsü atema pai meranga inyak, aser iba yongji pa dang 'People's Leader' ta aja. Asenok asoshi lenir tajung ka samaogo. Asüri yutsür aoba kinunger adianutem den asükhi lemsar aser asür tanüla teti tatem maka tesunep nung anisüngzükjang ta

sarasademtsür, ta Minister Along-i ashi.

Tanep ENPO tir, C. Sashi Naga asüba osang angashia aoksar aser kanga sarasademtsür, ta Minister, Planning & Co-ordination, Land Revenue, Parliamentary Affairs, Neiba Kronu-i sangdong ka nung ashi.

Pa ya ajemaluba, bendanga agütsüba lenir ka liasü, shibai jenjang balala nung lokti tenzükba aru. Pa ya tawa ang ENPO tir shim aser aji masüdanga pai khuret jenti bena liasü. Pa asüba ajanga asen state nung lenir tajung ka samaogo, shibai teti lokti ajungtsü atema inyaka liasü, ta Minister Kronu-i ashi.

Tanü, May 17, 2021, Referral Hospital, Dimapur nung ajungbena ENPO tir C. Sashi Naga asüba osang angashia National Socialist Council of Nagalim (NSCN) indang Collective Leadership (Chairman Mr. Q. Tuccu, Vice-chairman Mr. Tongmeth Wangnao aser General Secretary Mr. Th. Muivah) aoksar aser sasa bilemer, ta sangdong ka ajanga ashi.

Naga nunger asoshi lenir tajung ka samaogo, kechiaser taochi maliba tasüba tekabo agi anojungi ENPO tir takum agi. Pa ya March 31, 2021 nung ang ENPO tir menden agizükler liasü, ta sangdong ajanga ashi.

Naga linük tenüng nung Collective Leadership ajanga mangyimer kibong aser ENPO nung par külemi tenzükler den asükhu lemsateper aser Tulusang tsüingremi parnok nem anisüngzük agüjang ta sarasademtsür. Nabebu Asür C. Sashi Naga tanüla teti tatem maka tesunep nung anisüngzükjang, ta Collective Leadership ajanga sarasademtsür, ta NSCN/GPRN indang MIP sangdong ajanga ashi.

K. Therie-i Imlong Chang asükhu lemsatep

Dimapur, Monupii/May 17 (TYO): Taoba mapang MLA inyaka alisang K. Imlong Chang asüba osang angazüka ni kanga sarasademtsür, ta NPCC tir, K. Therie ajanga sangdong ka nung lemsatep.

Tuensang village nungi tamale graduate asürttem rongnung Asür Imlong Chang ya ka liasü. Pa ya Circle Officer ka ama sorkar mapa inyak tenzük aser mapang tatsüka lir Assembly ajanga nübür

tenzüktsü mechi mapa yutsü.

Asür Imlong ya yimjung sapuba nübu ka liasü aser yimtenren tsütsü tang tajungti pa asüba ajanga Chang kin atema kisüing masü saka Naga nunger ajunga atema takoksa tulu alitsü, ta Therie-i ashi.

Asür kibong den ni asükhu lemsateper aser Tulusang Tsüingremi mangyimer kibong nung tesunep aser tashi agüjang ta sarasademtsür, ta sangdong ajanga ashi.



Kiphire district nung tawa COVID-19 positive cases tali akumba mechi District Task Force tawabangba kübok Kiphire Town nung May 16, 2021 nü tapi agi COVID-19 jangjatsü atema sample bendena liasü. Iba mapang sample 86 tendangba nungi COVID-19 positive pongu liasü, aser tang district nung COVID-19 janjateta alir nisung 33 jungogo.

Mizoram nung AR-i Military Nursing Service candidate atema online test ayongzük



Mizoram nung AR-i Military Nursing Service candidate atema online test ayongzük

Aizawl, May 17, 2021 (Agencies): IGAR (East) Headquarters kübok 23 Sector Assam Rifles indang Aizawl Battalion-i Mizoram nung tetsürtem atema MNS Guidance Capsule sentong ayongzük a giogo.

Military Nursing Service (MNS) candidate atema iba assessment test aser counselling ya March 1 nungi April 16, 2021 tashi agi.

Mizoram nung tetsürtem nungita yaritsü aser tetsürtem nem tim temeden agütsütsü nükjidong nung Aizawl Battalion - Assam Rifles-i iba sentong ketdangsüa agi.

"MNS Guidance Capsule sentong den atongsema Aizawl

Battalion-i MNS Cadre indang shilem agir candidate ajak atema online assessment test aser counselling session agiogo," ta AR-i metetdaksü.

MNS nung adenertem taruba competitive examination atema renema lidaktsütsü aser state nung Covid-19 tensa tamajungdang parnoki pei wadang nung temolung agütsütsü ajungshitsü nükjidong yur Assam Rifles-i iba sentong (online) achaayanga agi, ta parnokisa ashi.

State nung lanurtem lenla ajunga nung ajungketsü aser tongtipangsa tetsürtem tebilemba angadanga parnok mapatong nungittsü asoshi Aizawl Battalion-i iba mapa inyak.

"Mizoram nung lanurtemi pei lima meimtsü asoshi tesayuba tejangja agütsütsü nükjidong yur Assam Rifles-i mapang shia sentong balala ajanga lanurtem ajungmesoa arudar," ta AR-isa metetdaksü.

Military Nursing Service Examination nung shilem agitsü tejangrartem tajungba renemdaktsütsü aser iba dak sendakba nung parnok nem shisatsü agüja yaritsü asoshi iba online sentong ya asalentong tajung ama agizükogo aser mapang shia Assam Rifles-i iba sentong achaayanga agitsü.

Iba online sentong ya Mizoram nung tetsür aikati pelaa agizükogo aser tetsür 60-i shilem agia liasü.

Assam sorkari ita 3 tsungda nisung ajak nem vaccine agüjang: Akhil Gogoi

Guwahati, May 17, 2021 (Agencies): Assam nung Sibsagar MLA Akhil Gogoi-i chief minister, health minister aser finance minister dang ita asem tsungda Assamese sensotem ajak nem COVID-19 indang vaccine agütsütsü atema mepishiogo.

Raijor Dal lenir aser MLA Gogoi ya tang Guwahati nung tepuokdak ka nung yua lir.

Cabinet teletetba mapa kuma meinyaker aser ibaji CM Sarma indang tebilemstü khuret lir, ta pai shidi zülü.

"Assam nung senso crore 3 ser lakh 30 nem agütsütsü atema COVID vaccine crore 6 ser lakh 60 Centre dang nungi meshittra CM Sarma temsüa lir ta shitetsü" ta Akhil Gogoi-isa metetdaksü.

Tawa COVID-19 agi shiranger ka Guwahati Medical College and Hospital (GMCH) nungi pungzük a süba atema jembidang "Assam health

minister Keshav Mahanta-i health department shilem ana-physical health & mental health lemsatsüla" ta Akhil-isa ashi.

COVID-19 tensa majungba agi shirangertem tekolok kanga anibelem aser iba atema parnoki teyari nungdaker, ta paisa shisem.

Ration card aliba kibong shia nem rations angati agütsütsüla. Jang, dal, alo aser shinü nunger agütsütsüla. Covid-19 ajanga kongshiba kibongtem nem ita 3-4 atema Rs. 5,000 agütsütsüla, ta Akhil-i shidi nung shia lir.

Sorkari COVID wara tanabuba atema renema maliba ajanga Assam nung tang iba tensa ajuruogo, ta paisa shisem.

Central Vista yangluba maparen anena atatsüla kechiyong linük nung nübortemi tang COVID vaccine nungdaker ta Akhil-i prime minister Narendra Modi luja olen ka zülusemogo.

Tripura nung kaketshirtem atema 'Vande Tripura' lapoktsüogo



Tripura chief minister Biplab Kumar Deb aser education minister Ratanlal Nath nati educational TV channel lapoktsüdag agiba noksa angur. (Agartala, May 17)

Agartala, May 17, 2021 (Agencies): Hombarnü Tripura chief minister Biplab Kumar Deb aser education minister Ratanlal Nath nati state nung kaketshirtem atema educational TV channel temeja ka lapoktsüogo.

School education department-i 'Vande Tripura' ta nungja agütsür TV channel lapoktsü.

Iba educational TV channel ya teti (24x7) dang lapoka alitsü aser school-i aoe kaketshirtem atema class kidang agiba ama tesayuba agütsütsü nükjidong nung tenzük.

Mezungbo, class tem record ser broadcast asütsü aser tatsüka lir iba channel ajanga online class tem broadcast asü tenzüktsü.

Hombar anüngdang Agartala kübok Civil Secretariat nung iba channel sayaba mapang, chief minister Deb-i, "Shisaliok ya tongtipang sector ka lir. Iba nung kaketshirtemi kaket shisatsü bushiba tsütsü temelenshi adokdakja aser terenlok lidaktsütsü asoshi inyakyim melenshitsuogo aser Union education ministry ajanga iba mapatong pelashishia agizükogo" ta ashi.

Tang India ajungalen Covid-19 wara tanaben adokba ajanga mepetmesü jenti ajuruba mapang, Tripura nung kaketshirtem pei pei kidang nungi class agitetsü aser kaket shisatsü bushiba tsütsü

tangazükba angutsü asoshi iba educational TV channel ajanga parnok kanga nungittsü, ta Deb-isa metetdaksü.

"Tripura nung ita 14 tashi shisaliok reju ajak shibang asünung, state nung shisaliok tsütsü takoksa jenti ajuruogo. Iba mapang educational sector tsütsü shilem 36% tashi takoksa ajuruba asadantetogo," ta Education minister Ratanlal Nath-ia ashi.

"Onoki sentong balala tenzüktsüogo, saka state nung shisaliok reju balala nung azünger kaketshir shilem 40% ket nung smartphone mali. Aji asünung, item timtem ajak asadanger sülen education department-i iba educational channel tenzüktsür," ta Nath-isa shisem.

"June ita nungi class tem 'live' tenzüktsü. Sensaksemba aser education dak sendakba osang ajak sangoktsütsü aser iba mapatong ajanga Tripura kübok tesem balala shilem 90% tashi ayimbangtsü," ta State education minister-isa metetdaksü.

Iba educational channel sayaba sentong nung chief minister aser education minister na den state chief secretary Manoj Kumar aser education secretary Saumya Gupta, school education aser elementary education department director tem, Saju Vaheed aser UK Chakma nunger aden.

NPP national GS Vivek Raj Wangkhem COVID-19 ajanga asü

Imphal, May 17, 2021 (Agencies): Taoba Manipur MLA aser National People's Party (NPP) national general secretary, Vivek Raj Wangkhem tanü Delhi nung Covid19 ajanga asü.

2002 Manipur Assembly nung Vivek Raj Wangkhem ya Congress ticket amer Kshetrigao constituency nungi takok angu saka tatsüka lir pai NPP nung aden.

Hopta ka tejakdang pa dak Covid19 aliba putet aser iba sülen nungi DRDO Hospital,

Delhi nung anepalua aru.

Meghalaya chief minister aser NPP national president, Conrad K Sangma-i Vivek Raj Wangkhem asüba atema mangyimba metetdaksüogo.

"Medemer tajung ka aser party atema bendanga agüja inyaker ka onoki samaogo. Par kibong, medemertem aser pusemertem den mangyim lemsateper. Pa tanüla anisüngzük ngudakjangma" ta Conrad-i metetdaksü.

Meghalaya Cabinet minister aser NPP lenir James

K Sangma aser James Sangma natia Wangkhem asüba atema mangyimba metetdaksüogo.

"NPP Manipur nungi Vivekraj Wangkhem tanü Delhi nung süogo. Pa tanüla anisüngzük dakjangma. Manipur Women Gun Survivors Network-i par kibong aser medemertem den asükhu lemsateper. Manipur aser NE atema takoksa ulura" ta Manipur Women Gun Survivors Network founder Binalakshmi Nepram-ia metetdaksü.



Hombarnü Assam health minister Keshab Mahanta-i Karimganj Civil Hospital semdangdang agiba noksa ka angur. Keshab Mahanta-i COVID-19 tensa asadangtsü atema tanü nungi Barak Valley semdang. (Karimganj, May 17)



TIR YIMYIM YIMOBILEM (EDITORIAL)

DIMAPUR SANGTENNÜ, MONUPII (MAY) 18, 2021

Tata shilembo inyaktsüla

A tangji, tashidak tasen aser tesashi asüba agi menatepa maotsü atema tang ama Covid wara alidang asürtem den akhi ama temeimertem aika adenshia asüpila sentep magitetter, iba jagi asenok ajaki sasar, kechiyong asenok nisunger yimya nung tasü mang den asüyonga tatem o shir pilaner aser taküm alidang mejungteptetyonga sürbo menungrar aser asüpila sentep nungbosa dener. Ajisüaka, joko alima tensa agi ojangji khenpigabo asenok yamai aotsü. Iba ama mapang yagi asenok anema alidang aser asenok mesüi taküm alidang akok tashi kinunger pi ta mali, ajak den jungtepa aser yaritepa alitsü nungdakba indang angatetdaksür. Iba denji ano asenok dak temeim aser awashi aliba jenjang tendangba mapangji tang ya ka lir. Atangji, temeimi tai ajak nembangja maksü aser timtem nungi dang kümzüker masü saka temeimibo tetsübu kecha metsübur aser pei ajung dang süka malir. Iba ama shitakba temeimji asen daka ali asü maliar tendangba mapangji tang ya lir. Aji oda, Laishibai ashiba ama, tatem anogo nung temeim mekongka akümtsübaji, tang amai tenüng (excuse) ka mesüra ka atemer asenoki kati ka dang temeim mesayuteti pei ajung dang bilema piladoktsü südi ta bilemer. Covid-19 tashidak wara indang bushidanger mongintemi ashiba agi, Covid-19 tashidak agi asüba nisung temang nung Covid mesenji malir, kechiyong tashidak mesen taküm alitsü asoshi temangjia taküm asütsü nungdaker. Ajisüaka, ano tali kümdangshia mozü kidang inyaktertemi mozü tzü agi tasü mang aser süngden ajakji jungjunga merüktetter agütsür, anungji tasü mangji kidang bener oagi, akhi ama nisung aika mesentepaka kinunger aser adianutem den asüpila sentep mapang tatsüka agir leper nunga akhi ama sannükeri sarasademtsür rema yutsüba nungji tashidak menatsüsa lendong tulukabo mali. Ajisüaka, tetsübutü shiruru asüyonga, onsara talila tsübuaba agi ola angashi nunga atentena adokba ama, asenoki Covid-19 tashidak mesen ya onsara talilaka tsübuaba amai reprangtetter, iba jagi tashidak mesen agi masü saka tsübuaba agi shiranger aser tsübuaba agi süadoker südi ta bilemer. Ashiko, asenok arogo nung tenzüker karibo asüpila sentepi aotsüa tsübuaba alitsüa akok mesüra tenzüker kinunger karibo tenzüker tema nokdanga alitsü akok. Kasaji mozü kidang inyaktertem karibo tetsübu agi shiranger tonga mouteti shisabolua alitsü akok. Ajisüaka, tashidak ya tasür dak nungi masü saka taküm alirtem dak nungi menar ta asenoki angatetra, asenok mozü kidang asüyonga, shishilembadak asüyonga asen taküm nungdak tapu balala lilyongka senzüba ajakji kasa danga ta rajemtsü. Asenok nisung shia tensa tajung aser tamajung ta mali, chibosa chiyongtsüla ta asüba amato, lokti, arogo aser yimten nung shilem agitsü tata shilem kar lir, anungji ajibo asen taküm agia tendanga agitsüla. Iba dangji dang taküm bendanga agüja tenzüker aser bendanga agüja inyak ta jembir. Tashidak wara aliyonga nungdak asünungji, asenok bazaar-i orr nisung teputetla memetetba purtem den shishilembababo asenoki rataa mebilemer saka asenoki anasatiba kinunger mangyim jashi nung aliba meteta khen semdang arubajibo ashibanger. Asenoki nungdakba purtem tonga oagi temeim mapa inyaktsü asoshibo SOP indang jembir saka online nung anogo shia osettsüset agizükbo manener. Taküm nung anü apuyonga aser tsünglu aruyonga, kechisüdirsüaka inyaktsüla mapa kar lir, anungji ajibo inyaktsüla. Aji oda, yimten yimsüsür aser ketdangsertemi tashidak tsübuaba agi kimaia madok, pei nübör asoshi mozüki aser achiajem tia indang memeteti lira; lokti tentet lenirtema tang ama tensa nung tashidak mena tsübuaba agi pei nübortem tia repringdanga mejaja aser ola madok kidang dang moka kazüra; Tsüngrem tenzüker tema tashidak mena tsübuaba agi shisabolua mangyimer ki tashia moutet, kidang dang sarasadema mongra; osangbenertema tashidak tsübuaba agi kimalen kechi atalokar memetet, kidang nungi angashiba osang dang lemsatepra aser sensosangertema pei taküm aser kibong kümzüksü asoshi dang bilema, tangar timtembabo mangu aser mangashi kümra; asenok ajak ka khen, ka khen ta azü ak shiruru memeyong iba lima nungi pilatsü. Covid tia yagi asenok rongnung memeimteptsü aser meyariteptsü ashir masü saka tashidak memenatsüsa akhidang dang nungi kanga agia tekümdangba asen taküm aser kibong alitsü indang ashir, anungji kanga kümdanga alitsüla saka tashidak tsübuaba agi asenok nisung aser Tsüngrem tsüngdang sentsü asütsüsa asenok malitsüla.

OLEMSABANG

Naga nunger Myanmar aliri mapang tajung alangzüktsü mapang

~ S. T. Yapang Lkr. Kohima

Alima nung teti yimjung malir, aser rara ajak ya tamajung asoshi masü, tajung ka ataloktsü asoshia azü tokshia raratsüsa akümer, yamaji raratsü mapang merarara iba mapang tajungji kodanga marutsü akok mesüra küm noklang tema süir ang iba maongkaji angutsü akok.

Tang Myanmar nung Kachin puri raraba dak alaka asen Naga nunger aliba tesem nung raraba kangabo mangashir. Myanmar tiyonglen, oda shidi süra Myanmar kiburtem shirnoki Naga nunger aser Kachin tesem nung rishikangshi inyaka Myanmar temoatsü ajak agia aruogo parnok o sepai na rara tiyalong lir, iba maongka tajung agia Naga nunger aliba tesem nung NSCN K nungi telok tila aika pakzüka oaka ano nütsüng peria lir aser Kachin pur aliba tesem nunga linük tenzüker telok ana asem tashi, tashi ita lir asünungji tang ya raratsü mapang tajung, kechiyong alima balala nungia teyari angutsü koka aliba mapang ka, iba den Myanmar sepaitem kolen ang mashi timtemba mapang ka lir.

Tang mapang Kachin aser Naga tesem nungi Myanmar sepaitem ainshia oa Myanmar tiyong nung adenshia lir, ibayongji telungpur den o tajung jembia alitsü. Naga nunger aliba tesem; koba akhi mapang nungi India aser Myanmar sepaitemi tsübur yangia rara tenzüka koda asütsü! Saka tanü merarara iba maongka ya marutsü südi. Bilemdangang NSCN K aser Myanmar sepai na yimjung nung aliba mapang yakümba ang NSCN K tesepti atsünga agidaktsüba to koda! Saka tangbo Myanmar sepaitem par kilung mapa tip metemjungger asünungji Naga nunger aliba tesem nung Myanmar sepaitemi timtem agütsüba osang mangashir, ajisüaka ya teti asoshi masüako, par kilung mapaji renemerbo ano asen Naga nungertem dang masü Kachin pur ajak timtemjako, tanü taküm kar lalur tarutsü jenjang tajung yangertsü mapang tajung, ajimesüra tanü Myanmar sepai kolen ang mashi timtemba mapang yimjung nung lira, ali mesama tashi par küboksa alitsü, joko merararai perangpong ajak toktsür temai adoka yimjung nung alitsü ta süra aji balaka, saka noknü meyutsüi alitsü süra tanü ya raratsü mapang tajungtiba, aser rara tenzüka asenok India kübok alir ajaki pei akok nongita yaritsü junger.

Myanmar sepai den raratsü melen, nübortem Myanmar toktsür artsü ajanga jena aotsü pur ang telungpur jaki noktanga mungra ibaji Myanmar tashi itdaktsüba maparen ka asütsü aser aji miim per mesütetba den kasa asütsü, iba jaki kenü pei dak mechitsü, tanü tashi pei mesütetba miim peri mechiba aneptsü alima nung mozü ngutetba mangazük.

Asenok tamangertemia Myanmar tiyonglen azütokshi tali adoktsü aser nübör o tashiyim agi yimsü asür sepai na rara tesashiba akümtsü ajungshitsü tim, iba den rara anentsü asoshi sarasadem nung meblemtem tajungba, kechiyong Myanmar tashi ita akümba aser tesünap nung alibaji asen adianutem asoshi lendong, asenoki Myanmar nung rara anentsü sarasademra aji yiar asüyonga tanakla asütsü, koba yiarnak ta asenoki ajar, iba kasa India nungera Pakistan aser China mashi ka den mashi mapang ka nung rara tulu adoktsü akok, ibala mapang asenoki India tepu kümra mesüra India takok asoshi sarasademtsüra ajia asen alenseta asütsü teyari meshia sarasademba den saku asütsü.

Myanmar nung aliba Naga nungertemi tang ya merarara asenok India kübok alirtemi ajuruba dang tamajungba ajurutsü shingaia meteta mali, kechiyong India nüchiso nguli Pakistan den artsü melatangteti makmakshishitepba mapang asen Naga nunger den yimjung o dang jembia ali, tezüluba nungbo mangu, saka tebang o angazükba agi "Nenok Naga nungeri mitsüktsü süngla meyangluteter nung koda" ta oda asenia temulung lemja alemtsüsa küm pezü pungu anükalem o dang jembia, aser asen Naga nunger aji agi pelazünger noknü kecha merenem, iba melen temesüng nungeri toktsür aoba perangpong amala metsü (salt) den melentep, item perangpongji amer asenok rishikangshia tepset, kechiyong India nunger ket nung kecha makai liasü, ibaji marem asenokia noknü amshitsü mulungtet, saka idangjibo India pei sasa nokdakteta kümer liasü, asenoki India sepai ka tepetra merijang ka aru, ano India takar aküm nungji rongsen agia mesüzük. Asen tsüraburtemi aji tajungtiba ta bilemer inyak, saka ya Tsüngrem anogoji masü liasü südi, mesüra asenoki Tsüngrem dang masüngdangi ya tenzüker asü tasa bilemdanger.

India nunger nüchiso 1947 nung ngur küm pungu shika Pakistan den artsü langdanga aser pei sasa nokdaksü angazük 18 Oct 1952 nung ang mezüng asen Nagalima nüchiso dak sentakba azü tokshia Wabong. Zasibito Nagi tepsetba otsü lir. Bilemdangdi India-ji British nunger alar ama yua liasüba lir, asen Naga nunger dang raratsü renemang sür küm ana 1948 aser 1949 danga renemshi nung asenoki India tiyong tashi atsünga aotsüba mesüra North East ajak ya asen Nagalima kübok ayutsüba jenjang nung liasü, saka asenok meji achi (meji achiba tetezü asa masü tajungtiba ta bilemer inyakdang kodanga shilua marutetsüsa takoksa tulu ajuruba).

Temesüng nunger tashi ita aliba mapanga süngla India nungeri aiben anema apusoa telungpur telok tenzüka tashi ita oa ali, iba mapang alima rara tanabuba ajurua telungpur teyakyakba aküm aser noknü aika benden, item kuli ajak bushiteter tekülak agi temesüng nungeri yutsür ajen, saka parsa shisa takabaji azü metokshii raraba nübör nem nüchisoji agütsür ama jembia, iba sülen India nungeri tekülakji ajizüka azü metokshii India ajak par kübok alitsü nükla yur tongpang nung nokdaker to masü azü metokshiba indang dang jembia tushi, anungji India kübok alir shirsa India nung medennür; ajaki azü metokshii raratsüji junger ta bilem, kechibasüra India nungeri aji tushia amshi, saka aji India pei sasa menokdaktetba mapang tashi dang liasü, yamaji tanü Myanmar pei sasa menokdaktetba mapang Naga nungertemi züzüa lira aji meji achiba ka dang asütsü akok.

Asen Naga nungeri raratsü mapang tajung nung merara, yamaji Mizo aser J&K amala ajaki tangar raraba mapang amui oa ali aser tangar rara temer pei lima asoshi raratsü nokdak, saka waro or tembanga akoshiba den saku ajuruba dang masü talanga alang nung scüa amsa ama dang ajuru.

Asenoki tang ya India den rara nung akoktsüla masü, külen parnoki telungpur den meraratetsüji temetet dang asünungji alemli ama yimdaklir rishikangshia tepsettsü aser ibaji aochia telungpuri atsüanem akatsü, ano külen shir lushu nung telungpuri India sepai dak injang kaloksüdir, idangjibo ajebtsü aser yutsür ajentsü, saka ano medemer timba anir arua iba yimer ajak pudena züker, ki rungdoktsüa tetsür tanur tali majung merenshitsü. Anungji asenoki tang ya raratsü mapang masü yimjung alitsü mapang ta angateta alitsü tim, saka ano mapang ka China mesüra Pakistan amala den rara tulu adoktsü shingaia meteta mali nungji asenoki mapang tajung ata renemshia lidi.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Evangelical Arogotemi Israel nung yimjung atema sarasademtsü ayonger



May 14, 2021 nü East Jerusalem nung Palestine nunger longkak aitertemi Israel nunger police den raradang tangokba noksa nung angur.

May 17, 2021: Evangelical lenirtemi Middle East nung yimjung alitsü atema Amongnü Global Day of Prayer amongtsü ayongzükba nung ajemdaker United States nung Arogotemi Israel nung yimjung alitsü atema sarasadem tenzükogo.

Congress of Christian Leaders Tir, Rev. Johnnie Moore aser National Hispanic Christian Leadership Conference Tir, Rev. Samuel Rodriguez nati sangdong ka ajanga, "Onoki Evangelical Arogotem aser alima tesem balala nung Khristantem dang Hamas kiralongrartemi amokmerenba ajanga takoksa angur Israel aser Palestine nunger atema sarasademjang ta mepishir," ta metetdaksü.

Taoba Hombar nungi tenzükba Hamas kiralongrartemi Israel dak rocket aika khaloktsüba sülen tensa tamajungba kümogo.

East Jerusalem nung Palestine nunger aika mindoktsü atema benoka aliba ken o dak sendakba nung Al-Aqsa Mosque nung police aser longkak aitertem tsüngda raraba sülen Hamas kiralongrartemi Israel anema apuser.

Taoba Hombar nungi

tenzükba Gaza nung nisung 181 süogo aser asürtem rongnung tanur 52 aser tetsür 31 densema lir; iba dak alia nisung 1,200 dak tema yiruogo.

Osangbener den jembidang Moore-i, "Hamas kiralongrartem aser parnok pusemer Iran nunger anema Evangelicals-i Israel aser Yihuda nunger pusemer. Tan hopta tatemlen nisung million aikati Israel aser parnok Arogotem atema sarasademtsütsü," ta metetdaksü.

My Faith Votes nung CEO, Jason Yates-ia Israel pusema jembio.

Jason Yates-i sangdong ja ajanga, "Khristan ka ama onoki Israel pusemer, kechiyong parnok ya Tsüngremi shimtetba nübürtem lir. America nunger ka ama onoki Israel ya tembar linük ka ama züngshir; Middle East nung democracy linükji Israel dang lir. Onoki Tir, Biden dang yimjak nung Israel pusemtsü ayongzükba. Linük nung süaka bendanglen süaka United States-i kiralongra mapatem magizüktetsü," ta metetdaksü.

Honibarnü US Tir, Joe Biden-i Israel Ato kilonser,

Benjamin Netanyahu aser Palestinian Authority Tir, Mahmoud Abbas naprongla dang tensa tamajungba makümtsü atema inyakang ta metetdaksüogo.

Biden-isa Israel-i pei linük kümzüktsü atema nokdakba onoki pusemer, ta ashiba den külemi tanurtem densema nisung aika asüba atema tebilemtsü akaba lemsatop.

May 10, 2021 nü Yirusalem nung aliba Al-Aqsa Mosque kima moapu nung Israel police den raraba mapang nung Palestine nunger 331 tashi yirua liasü. Anepdang Israel nungeri Jerusalem Day amongtsü renemba mapang Palestine nunger longkak aitertem aser police na tsüngda rara tenzük, aser iba rara nungji Israel police-a aika yirua liasü.

Al-Aqsa Mosque compound nung Palestine nungeri longkak aita police anema apuso. Iba tesem ya Yihuda nungeria temeshi tesem ka ama züngshir. Yihuda nungeri iba tesem dang Temple Mount ta ajar, kechiyong iba tesem nungji Laishiba nung aliba Yihuda nunger tekülem ki ana liasü.

Malaysia nung Arogoi India nung Covid agi kongshirtem yaritsü

May 17, 2021: Malaysia nung Kuching Arogoi India nung coronavirus wara anema raraba nung yaritsü atema senotsü lenmang bushiba campaign ka tenzükogo.

Kuching Arogo nung tongti putir, Simon Poh-i Sarawak state aser linük tesem balala nung Khristantem dang India nunger yaritsü atema senotsü tenla agütsüba den külemi India atema sarasademjang, ta metetdaksü.

Amongnü (May 16) St. Joseph Cathedral nung tekülem sentong agiba

mapang nung pai, sangküm May ita tashi tenla maneni bendentsü, ta metetdaksü.

"Asenoki tangar taküm nung temelenshi bener arutsütetsü. Asenok senotsü agi timtemaka asenok dang nungi tim tatabapurtem aika lir," ta pai ashi.

"Parnok tebilemtsü bentettsütsü atema asenok ket nung rongsem malitsüa akok. Asenok sensak tia nung liaka kodang asenoki temeim aser tamang agi tenla agütsüdir ibaji ajanga asenoki parnok taküm nung

temelenshi bener arutsütetsü," ta pai ashi.

Tenla agütsütsü melungertemi SarawakPay e-wallet mesüra Kuching Arogo dangi bank transfer asütsü akok, ta putiri metetdaksü.

Catholic Bishops' Conference of Malaysia (CBCM)-i India yaritsü atema ayongzükba nung ajemdaker Kuching Arogoi fundraising campaign ya tenzükba.

CBCM-i senotsü tenla ajakji May ita tatabanglen tashi nungbo India nem agütsütsü.

ANOGO ABEN TSÜNGREM DEN

Tasü itdaksüba azüh

"Yisu züh agi temeshidaki atutsü tasü ait nung..... asenoki ochi temulungjang agi tamang tabensaba nung anasai odi". Ibri 10:20-22.

Alemlü Yihuda yimsü ozüing nung temeshitiba sabang (Holy of holiest) jagi küm nung khen dang aitsü aser ajia temaba putir dang aitsü ozüing tesashi liasü.

Iba tangatetba nung parnoki par yimsü ozüingji amlepa aruya alidang, kodang Yisu taküm tenlaba ajanga temelenshiba meimchir dangi bener arutsü iba mapang nungjagi shirnokisa Pa senti azüh agi shitokja kümzükdir parnok ajaki iba temeshi sabang jagi anogo lepa yitetsü jenjangji alangzükja parnok rongnung tasü itda küm daksü.

Khrista tesayuba nung Pa dak amangbapur lepaji putir kaka, anungji Pa tsüngdang tulutila, takar-sensaker mesüra tashitemeteter-memeteter kecha telemsa makai ajak kasadang ta sayur. Tenyartem mapang Peter-i anir parnok taküm lepa dak Khrista zühi alangzükba tanela ainji kodang amenlok parnoki tasü itda alima tsüngdang iba tekümtet osangtajung kuli asü. Temeim adianu, Khrista senti züh agi alangzükba medentsüba takümji ne dak lira naia tasü itda Kotak yimli temeshiba indang kuli süjen sünütsü.

Sarasadem

Kibuba Yisu Ne senti azüh tokshiba ajanga kü nem kotak lenmang lapoktsüba indang tasü itda kuli asütsü Nai ne yariangma. Amen

Tsüngrem nungi osang

- I.Amongla, Supply colony, Dimapur

1. December 25, 2020 Alima dangi amang arudar ta shiogo Lai YOEL 2:2 Amang aser mangbang - subang anogo mepet aser amang. Temelem anogo nübür tulu aser tashi tait ka nak naka tenemtem meibanga lir; iba ama akhidang melidang mesüra oda putu ajak küm songtema ibaji mesüka parnok sülen joko malitsü.

2. May 5- 2021 temalen nungi tetsür ka alua angu. Ni sarasadema alidang temalen- sang telunglen tatidang, ta tanulai metetdaksü. Ken no-138, Khristan kümdanga jajang Lai Putipuyang 36:16 - 17 (Lai tekongtem ya sarasadema züngdi)

Putipuyang 36-21 Yerimia bang agi Kibuba o jembiba ataloktsü asoshi; linuki pei amungnu memungi liasü.

Küm neter abensadaksütsü asoshi linukji azüing azüing toktsüba anogo ajak, linuki amungnu mamung.

Laishiba nung aliba ataloka arudang asenok taküm tanela renemtsü mapang tongogo, amang melem ama covid wara tesashi ibai dang masü alima ajaklen timtem tulu lendongbang nung lir. Alima merüktedang sentioset aser süngdong tajunga amsema entok ama wara agi Tsüngrem chirtem tajung jenti samago.

Amang nung tesangwa dang nüngdakba ama tanga lenmang kecha mali-a taküm Tsüngrem bushidi.

Oba Tsüngrem amang wara tesashi sushi-a odakjang ne.. aochiang Nai Nüu chirtem kümzüktsü melang ta manani shidi.

Filipi 4:6 Kecha nunga temulung tatem-ma; saka ajak nung sarasadema aser mepishiba tenüngsang agi nenoki mepishiba Tsüngrem nem metetdakjang.

Temeibatam, Kibubai ajak meteta lir, saka asen inyaktsü mapabo asen nem inyakdaksüner.

Asena kümdangdi, tenüngsang nüktsü, timtem shisabulu nüktsü, ajemalua Pa dang mepishiba nüktsü asen temulungjang ajak Tsüngrem nem metetdaksüdang Kibubai mapa inyaktsü aser aochitsü ta amanga sarasademdi ta küli asür.

Tsüngremi moajang.

OLONG PAITEP # 5815

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN		LANGTSÜNGLEN	
2. Auo nung chiyongtsü asenba	- (7)	1. Lenmang	- (7)
5. Mangyimba mapang	- (5)	2. Aor kidong ka tenüng	- (6)
7. O tamendakdak	- (4)	3. Tenarong maten	- (6)
8. Pei dak malangba	- (7)	4. A _ _ _ g	- (3)
10. Juli	- (7)	6. Mopung apodoka	- (3)
12. Sen ayudak	- (7)	ola adokdaksüba	- (7)
14. Tenük agi ajitet	- (4)	9. Tongtipang tagitsü	- (6)
15. Tamajung aküm	- (5)	10. Menungra bilem	- (6)
16. Apuso	- (7)	11. Aiür	- (6)
		13. S _ _ _ k	- (3)
		14. T _ _ _ r	- (3)

OLONG PAITEP # 5814 TELANGZÜBA

TIPIEN :	LANGTSÜNGLEN :
1. Yiar, 3. Tesola, 7. Yimra,	1. Yimti, 2. Amen, 4. Shiner, 5. Alaka,
8. Tangar, 9. Peria, 10. Tanur,	6. Satan, 9. Putet, 10. Tembar,
11. Tasen, 13. Lemjem, 15. Tambu,	11. Tatok, 12. Amang, 14. Jala.
16. Khuret, 17. Sang.	



AJEMALUBA TAJANGZÜK KONANG NUNGSANG

Tebu : Asangur tanübo ni nungdak kar adoka imdongi aotsü alinungji tamasa anabo sarasadem mapang tatsüka agiti arungma.

Asanguba : Haija, oda akümüli nung kütsü tasola alima nung meliaka, oda nai mapang ajak nung ni atema asen Tsüngrem dang nü sarasadem nüktzü ajanga nungita aruba ama nia tanü tashi maparen ajak nung takok ngua asen teyangluri yaria arudar.

Tebu : Süra ner medemnungba tua taoba mapang NPSC tatidang agüja aliba nung tu takok tajung nguogo ta angazüker, aji shidak asü koda?

Asangur : Hauja, kü medemsang tua nai angazükba ama jenjang tajung nung mapa tajung anguaji, oda pai inyakba ajak nung asen teyangluri yarir sülabä.

Tabo : Oda ni amanger nenok lanuwa nungi asen Tsüngrem akümstüba inetba jala jabaso kaka asü nungji, ano tali dang ajemalua mapang ajak nung alitsü dang merangangma, aser aji obala tamang sarasadem.

Lilir : Mr. S. Repa pongener, Mon Bosti (Assam)

TANÜBO NAI LANGZÜANG

Q. Koba ajanga Andaman and Nicobars pilatsür?
 A.Ten Degree Channel B.Eleven Degree Channel
 C.English Channel D.Indira Point
 _____ (Taruba adok nung onoki langzüksü)
YASHI ADOK TELANGZÜBA : Juba

AO OSHI ANGAZÜKDAK:

TANÜ ANGAZÜKTSÜBA OJANG



Aja

(v) Arung ta ashiba (call)
 * Tsüngremi Samuel **aja**.

Jabili

(n) Akhidang Aori amshiba sen (Ao currency)
 * Akhidang asen tsüraburi sen dang **jabili** ta aja.

NAI-A YA METETTER MA?

STREAMING SABANG BALALA AJANGA SAYATSÜ ALIBA INDIA INDANG WEB SERIES KAR

- Mai Hero Boll Raha Hu, Zee5
- Kamathipura, Disney + Hotstar
- Hush Hush, Amazon Prime Video
- Finding Anamika, Netflix
- Aranyak, Netflix
- Special Ops 1.5, Disney+Hotstar
- Mumbai Diaries Season 2, Amazon Prime
- The Family Man Season 2, Amazon Prime
- Broken But Beautiful Season 3, Zee 5
- The Test Case Season 2, Zee 5
- Yeh Kaali Kaali Ankhein, Netflix
- Ray, Netflix
- Little Things Season 4, Netflix
- Masaba Masaba Season 2, Netflix
- Mismatched Season 2, Netflix



SUDOKU # 5858

TELANGZUBA # 5857

	5	2		6			8		7	4	8	9	1	5	2	6	3	
				8	7	3		1	2	2	6	1	4	8	3	5	9	7
3		8	1		2			9	3	5	9	2	7	6	4	8	1	
				7	9	5	2			6	8	7	5	9	4	1	3	2
5		7					9			4	9	3	1	2	8	7	5	6
8		9		4	1	7	5			5	1	2	6	3	7	8	4	9
	6		4		7	8	9			1	2	4	3	5	9	6	7	8
7	8	4		3				5		8	3	5	7	6	1	9	2	4
		1		2		6				9	7	6	8	4	2	3	1	5

OJANG LUTEP # 5401

GATANR :

LIIRBALO :

GAJUN :

METEMETI :

SASHI :

LUNMUG :

MRAJEA :

NGRORONG :

KAADO :

TSHITEÜKPER :

OJANG LUTEP TELANGZÜBA # 5400

TANURI TESAYUR NUNGI YIMYA TAJUNG MANGAZÜKI TSÜRABURI SAYUBA NUNG ANIDAK

TAN HOPTA ATEMA - KOMA SÜLA ?

Q. Covid mozü kidang inyaker doctor, nurse aser staff-tem asoshi anogo shia chiyongtsü mozü ki anasa aliba arogotemi longjemer agütsü nunga koma süla ?

Cyclone Tauktae ajanga Karnataka nung nisung 29 sama aser 8 asü



Mumbai, May 17, 2021: Arabian tzyim nung cyclone Tauktae ajanga Mumbai nung yipru agi BKC jumbo Covid vaccine centre ka raksaja aliba noksa nung angur.

Bengaluru (Karnataka), May 17 (Agencies): Arabian Sea nung Cyclone Tauktae ajanga Karnataka aser Goa tzyimkümlen yipru sashia ait, aser Karnataka nungbo nisung ti asüba den külemi ki 300 dak tema raksatsüogo. Tauktae cyclone ya cyclonic yipru tesashi ka kümdar aser tang Gujarat tzützüleni odar; Amongnü iba yipru agi Karnataka kübok

district 7 kongshiba mapang arrshi küm 3 tebur ka densema nisung ti süogo. Karnataka kübok Dakshina Kannada aser Udipi district na nungbo ki 300 dak tema raksatsüogo. Met department-i state tesem ajaklen tzyinglu sashia arutsü, talisa tzyimkümlen aliba district tem nung tzyinglu tesashiba arutsü aser Mongolbar tashi nungbo

tzyinglu aruba süngjemtsü, ta jelia metetdaksür liasü. Goa nunga yipru ajanga süngdong aser electric indong aika lao, aser ibaji ajanga tesem aika nung light supply line raksaogo, aser ibaji yanglutsü atema anogo ana agitsü. Honibarnü Kerala nunga tzyinglu sashia aruba den tzyim nung tzyisem tulu ajanga kiojen jenti raksatsüogo aser nisung ana asü. India Meteorological Department (IMD)-i ashiba agi, cyclone Tauktae ya cyclonic yipru tesashi ka kümogo aser taruba ghonda 24 tsüngda ano tesashiba akümba sülen Mongolbar anepdang yakta Gujarat tzyimkümlen alir nisung lakh 1.5 shi ainshidaksüogo, aser kümzükbä maparen den relief atema National Disaster Response Force (NDRF) den State Disaster Response Force (SDRF) team 54 state nung lemmükja lir.

Rajnath Singh-i Anti-Corona virus mozü 2-DG sayatsüogo



May 17, 2021 nü New Delhi nung Union Defence Minister, Rajnath Singh aser Health Minister Harsh Vardhan nati anti-COVID drug 2DG sayaba noksa nung angur. Coronavirus treatment atema 2DG mozü ya DRDO-i yanglu.

New Delhi, Monupii/May 17 (Agencies): Hombarnü New Delhi nung Defence Minister, Rajnath Singh aser Union Health Minister, Harsh Vardhan nati DRDO-i yangluba anti-Covid mozü 2-DG sayatsüogo, ta ketdangsertem osang ka ajanga metetdaksü.

mesüra anibelemtsü menüngdak, kechiyong iba wara ya tanaben prokdar, aser kodang süitsüar memetet. Asenoki kanga kümdanga inyaksüla," ta ashi.

Iba sentong nung jembidang Rajnath Singh-i, anti-covid mozü yanglutetba ya ajanga coronavirus tashidak agi shirangertem treatment atema teimla ka agütsür, ta ashi. "Iba ya asen linük nung scientific tashi aliba temaitsü lir," ta pai ashi.

Singh-i ashiba agi, oxygen supply süaka ICU yipten achaayangba süaka mesüra liquid oxygen abentsü atema cryogenic tankers anepaluba süaka sorkari ajak süoki ia agia inyaker.

Drugs Controller General of India (DGCI)-i coronavirus tashidak agi mejungi shirangertem treatment atema 2-deoxy-D-glucose (2-DG) mozü amshitsü temelaba agütsü. Union defence minister-i, tang mapang ya anisüngzüksü mapang ka masü mesüra anibelemtsü mapang ka masü, kechiyong iba wara ya kodang süitsüar memetet, ta ashi.

"Health system tashi taitba akümtsü atema Medical Corps-i retired doctors-a mapa nung anioktsü telemtetba agiogo, ta ni tepela nung sangdonger," ta pai ashi.

DRDO headquarters nung jembidang pai, "Asenok anisüngzüksü menüngdak,

May 8 nü Defence Ministry-i, hospital nung amongertem dak drug 2-DG tendangba ajanga iba tashidak nungi kera taneptsü anguba jangjaogo, iba denji külemi oxygen nüngdakba ajema kümdaksür, ta metetdakja liasü.

Narada kenonung TMC lenirtem apuba anema Mamata-i longkak ait



Kolkata, May 17, 2021: Hombarnü Kolkata nung CBI-i TMC lenirtem- Fhirad Hakim, Subrata Mukherjee, Madan Mitra aser Sovan Chatterje nunger apuba anema TMC züngsemtemi CBI headquarters kima longkak aitba noksa nung angur.

Kolkata, May 17 (Agencies): Narada sting operation ken o dak sendakba nung Hombarnü Kolkata nung CBI-i West Bengal nung minister ana- Fhirad Hakim aser Subrata Mukherjee na den TMC MLA, Madan Mitra aser taoba mapang minister, Sovan Chatterjee nunger apuba sülen ghonda ishika tsüngda TMC pusemertem noklang aika CBI office kima adenshia longkak ait.

Tawa state Angh-i ketdangsüa Fhirad Hakim aser Subrata Mukherjee natibo minister inyaksü atema tenangzükbä agiogo. CBI office kima TMC züngsemtemi party wako amer CBI aser Centre nung BJP-i aniba NDA sorkar anema yimyim ayima longkak ait. TMC-isa CBI dang, sting operation nungji Suvendu Adhikari aser Mukul Roy na tenüng-a densema lir, süra kechiba tenabo mapu?, ta asüngdang.

Mathew Samuel-i agia liasü, iba mapang nungji TMC minister tem, MP tem aser MLA tem mesükba nisungtemi company nungi züngsem kar ket nungi sübokrem agiba noksa miima tangoka liasü. Sübokrem agiba noksatemji 2016 küm West Bengal nung assembly elections agitsü mapang anasa sayaa liasü. Iba sülen 2017 küm March ita nung Calcutta High Court-i sting operation ji bushisüngdangtsü atema CBI dang tuyu.

TMC tongti lenir aser state Chief Minister, Mamata Banerjee-a CBI office tonga aoba sülen ghonda ishika mener longkak aita liasü.

Sting operation agiba mapang Suvendu Adhikari ya Trinamool Lok Sabha MP liasü aser Mukul Roy-a TMC nungi Raja Sabha MP liasü saka tangbo tenaprong BJP nung lir. Tawa State Angh, Jagdeep Dhankhar-i par pezüprong anema ken o akatsü atema temelaba agütsüba sülen CBI-i charge sheet renemer parnok apu. 2014 küm sting operation ji Narada TV news channel nungi

Hombarnüsa special CBI court kati par pezüprongla nem bail agüja chiokogo. Central Bureau of Investigation (CBI) atema ken o jembitsüribo court dang, par pezüprongla ya tashi tulu aliba lenirtem lir, anungji parnok bail nung chiokra iba ken o bushshisüngdangba maparen nung timtem agütsütsü, ta metetdakja liasü. Hombarnep par pezü apuba sülen Nizam Palace nung aliba CBI office nung yua liasü.

India nung ano Covid agi nisung 4,106 asü

New Delhi, May 17 (Agencies): April 21, 2021 nungi tenzüka India linük nung anogo shia nisung lakh 3 tema dak coronavirus tashidak puteta aruba sülen tang mezüng lakh 3 den tajemba dak iba tashidak putetogo; tesüiba ghonda 24 tsüngda linük nung nisung lakh 2.81 dak coronavirus putet aser iba tashidak agi shiranger 4,106 asü, ta Hombarnep 8:00 ako nung Union Health Ministry data ajanga metetdaksü.

aser ibaji coronavirus caseload nungi shilem 14.09 lir. Linük nung iba tashidak agi shiranger anepba shilem 84.81 (nisung 2,11,74,076) lir aser iba tashidak agi shirangertem asüba shilem 1.10 lir.

Tang linük nung coronavirus agi teshirangdakpur 35,16,997 lir

Hombarnü Indian Council of Medical Research (ICMR)-i, May 16, 2021 tashi nung linük nung samples ajak agi 31,64,23,658 tendangogo aser iba nungji Amongnü samples 15,73,515 tendangba densema lir, ta metetdaksü. Amongnü tashi nung India nung coronavirus vaccine dose crore 18.3 agütsüogo.

Pakistan Opposition lenir Shehbaz no-fly list nung züngoksemogo

Islamabad, Monupii/May 17 (Agencies): Ato Kilonser Imran Khan-i anir Pakistan sorkari Hombarnü Opposition lenir Shehbaz Sharif, no-fly list nung bendenloksüogo aser iba ajanga pa temang anepalutsü atema bendangleni motettsü.

Iba ita tetenzüklen Lahore High Court-i Pakistan Muslim League-Nawaz (PML-N) tir Shehbaz, medical treatment atema bendangleni aotsü temelaba agüja liasü.

Bail nung tepuokdak nungi chiokba sülen arishi küm 69 tain Shehbaz ya May 8 nü London-i aotsü liasü, ajisüaka Federal Investigation Agency (FIA) team kati pa airport nung sot. FIA-i, pa provisional national identification list (PNIL) nung züngoksema lir ta shia nokdang. Iba list nung alirtem khen atema linük toktsür aotsü memelar. May 8 nü Doha-i aoba tayimtsü ka nung mener aotsü lia Shehbaz nokdang.

Hombarnü Islamabad nung osangbenertem den sensaksemba mapang Interior Minister Sheikh Rashid Ahmed-i, federal Cabinet-i telemtetba agiba sülen Shehbaz, exit control list (ECL) nung bendenlokogo, ta ashi. Interior Ministry special committee kati May 12 nü Cabinet dang Shehbaz linük toktsür meyok nung tajungba asütsü ta ashi, kechiyong pa ochimashi ken o kar nung aija okadak ken o benoka lir.

Shehbaz, taoba ita tepuokdak

nungi bail nung chiokba sülen temang anepalutsü atema London-i onüa liasü. Interior minister-i ashiba agi, Shehbaz-i pa bendangleni oa temang anepalutsü atema medical documents ka danga magütsü aser pa kechi agi temang tim atemer, iba indang osanga tejangja magütsü.

Taoba hopta Shehbaz-i pa senzüsönongtsü tenokdangba agütsür alirtem rongnung züngoksema atema ashishiogo aser khen atema bendangleni oa temang anepalutsü asüngdang. "Ni cancer agi shiranga liasü aser ni New York aser London nung temang anepaluogo. Ni tepuokdak aliba ajanga ita tenet dak tali temang anepalu mesütet" ta PML-N leniri ashiba den tepuokdak temang tendangba sülen pa tangsa tang temang anepalutsü nüngdaker ta ashi.

Interior minister Ahmed-i ashiba agi, "Shehbaz ya pa teti Nawaz guarantor liasü. Ajisüaka pa meyipa anir arutsü melena pa dena ajentsü meranger."

"Nawaz Sharif meyipa marura kechiba Shehbaz meyipa arutsü? Iba ya common sense amshitsüba ken o ka lir," ta pai ashi. Sharif ya 2019 küm November ita nungi medical dak ajemdaker London nung lidar.

Kasa mapang nung Imran Khan-i aniba sorkari Sharif ya samara bushir ka ta sangdongogo aser pa indang passport magi kümtsüogo.



PALESTINE WILL BE

Israel aser Palestine nunger tsüngta tang rara adoka aliba mapang Palestine busema Chicago, United States nung nisung kari Palestine indang nisan aser poster amer yimtung nung jajadang tangokba noksa ka yangi angur.

Myanmar UN envoy-i military den tesendaktep mayutsü mepeshi

New York, Monupii/May 17 (Agencies): United Nations (UN) dangi Myanmar ambassador Kyaw Moe Tun-i alima kintem dang, linük military Tatmadaw nem senotsü teyari agüja aliba nokdangtsü mepeshia metetdaksüogo.

NHK World den sensaksemba mapang pai, sorkar atsüngtokba sülen nüburtemi longkak aitba anema military-i tashi amshiba anendaktsütsü atema alima kintem dang military den sendaka aliba company nung sen mintoktsü aser parnok den tesendaktep mayutsü

ayongzükogo Kyaw Moe Tun-i, "military chain ajanga senotsü yimoka aiba ajak tangsa tang anendaktsütsüla. Parnoki item rongsen ya Myanmar nungertem tepsettsü atema amshitsü," ta pai ashi.

Paisa, military yimsüsüba anemertemi amenokba national unity government pusemstü atema nüburtem ayongzükogo. Maneni pai Myanmar temeket nung aliba linüktem dang, military inyaksangshi ajanga jena aotsüsa akümba Myanmar nungertem nem tejenokdak agütsütsü mepeshiogo. Kyaw-i, longkak aiterem

kari prangbong injang amshia military anema nokdaksü jenjang agiba osang prokshiba indang jembia liasü.

Pai ashiba agi, nüburtem taremsük makai kümogo aser yimjung nung dang longkak aittsü atema parnok mesüzüktsü tasak kümogo. "Myanmar nungertem kümzüka ayutsü atema onok sasa dang jenjang ajak agütsüsa akümer," ta pai ashi.

Iba sülen Kyaw military anemba temaitsü three-finger salute agütsü aser ashiba agi, "military coup tamakok angütsüla aser Myanmar nung democracy benoktsüla,"

United Kingdom nung COVID-19 talenba salar : Boris Johnson



Wimbledon, Monupii/May 17 (Agencies): England, Wales aser Scotland nung lockdown talenba salaba mapang, nüburtemi coronavirus anendaktsütsü asoshi pei inyaktsü maneni inyaktsüla, ta Boris Johnson-i ashi.

Tangbo nisung million aika kilung nung adenshitettsü, pubs aser restaurants tem semdangtettsü.

Bendanger senzüsönonger nokdanga aliba agienogo aser ozüing tasen agi melen.

"Lockdown nungi adoktsü atema asenoki sentong yangluba nung alizüing ka tongtetogo, saka asenoki kanga kumdanga taruba mera ya agütsüla," ta

Britain Ato Kilonser Johnson-i ashi.

India nung mezüing jangjatetba coronavirus tapu ka UK nung maneni prokshia aoba mapang ozüing melenshir, saka Greater Manchester kübok Bolton aser London o Sefton tesem kar densema iba tashidak kanga sashia jateta alidak nübur ajunga tendanga aor.

Sorkari iba virus tapu ya kanga junga miter aser menatepa aoba tali akumdk arrsanga mera agir, ta Johnson-i ashi.

England nung tanünga tenokdangba tem June 21 tashinung agientsü sorkari temolung lemteta lir, ta Business

Secretary Kwasi Kwarteng-i osangbener dang ashi.

"Tanaben lapoktsü atema ano hopta pongu lir aser asenoki data repringshitsü. Data balaka alitsü - tashidak ya yimya balala nung prokshitsü, mozü agiba indang osang talila angütsü aser June 21 atongtsü hopta ka lia telemtetba agütsü," ta pai ashi.

Mozü agütsü nungnangba atema nüburtem bendanga mamshiner saka tesem kar nung asenoki bilemba ama maor, saka tesüiba ita ishika tsüngta mozü agir timba kumogo aser mozü ya aginung dang pei kibong kumzüka alitsü ta nüburtemi angateter, ta Kwarteng-i ashi.

Bolton nung hopta tatemlen nisung 6,200 dak tema mozü agir liasü, kong India nung aliba coronavirus tapu ya timba lir. Aji masüadang COVID-19 mozü mezüing agütsüpur nisung 10,000 shi liasü.

Iba virus tapu ya temelaba menashia aor, ta scientist temi amanger, saka mozü yagi mapa inyaker ta data ajanga sayur. Saka tang tashi mozü agi mapa inyakba indang kuli tejangja monguteti lir.

Sorkar indang scientific advisory group, Sage nung züngsem, Sir Jeremy Farrar-i

ashiba agi, tesüiba ita 15 tsüngta lockdown ozüing agienba ya telemtetba tasaktiba liasü.

UK tesem aika nung iba tashidak ya tashi ulua akümer, saka linük tesem ajungalen mozü agiba ya takok tulu nung lir, ta Sir Jeremy-i ashi.

India nung ngutetba virus tapu ya kanga kera prokshia aoba mapang ka nung aser lanur aika ano mozü magi alidang lockdown salaba ya tebilemstü tulu lir, ta British Medical Association ajanga ashi.

England, Scotland aser Wales nung lockdown talenba ajema kumaka linük shia temelenshi balala lir.

"Ibai mapang talangka nungi ata aliba lir, saka virus ya tang tashi tebilemstü tulu lir, anungji maneni kanga kumdangtsüla," ta Scotland indang First Minister Nicola Sturgeon-i tweet asü.

Scotland nunga Glasgow aser Moray nung tashidak prokshia aoba tali akumba ajanga yangji benoka aliba ozüingtem mesalatsü. Glasgow nung arishi küm 18 aser 39 tsüngta nüburtem dang tekeratiba nung mozü agütsü ajungshir.

Ato Kilonseri Deobar nikongdang sangdong ka nung, "Nisung ajaki pei teinyaktsü

inyaka hopta nung anaben tendangtsüla, ajaba mapang mozü agütsü arutsüla aser teka, tejak, tetsüngta aser mopung tajung bilemtettsüla," ta ashi.

UK nung tang COVID-19 mozü doses mezüingbuba ya nisung million 36.5 dak temai agiogo aser tanabuba doses ya million 20.1 nem agütsüogo.

England aser Scotland nung iba tashidak agi temang nung timtem agütsüba meliaka angati tendangteter, koba agi minute 30 nung osang agütsür. Wales aser Northern Ireland nunga kidang nungi mapa meinyakteter nem angati tendangtsü maongka agüja lir.

Ajidang masü Hombarnü nungi tenzüka bendangleni jajartermi NHS app amshitettsü, koba NHS Covid-19 app dang nungi balaka lir, koba agi parnok mozü agiba kuli sayur.

Arirtsü nung nüburtemi iba app ya amshitettsü, ta Transport Secretary Grant Shapps-i shia liasü, saka linük kar nungi aitba nisungtem kanga junga mita tendangtsü mesüra quarantine asütsü, ta sorkari ashir.

UK nungi danga linük 12 semdangtsü akok aser meyipa shilangba sülen quarantine masütsü, aser yangji Portugal aser Israel dena lir.

TEMEIM OJALA



Lt. Anungla

Wife of Lt. T. Meren Ao
JULY 27, 1963 - MAY 13, 2021

TEMEIM OJA... NA TASÜTAIT ASER TEMEIM AKABA ASER TAGÜTSÜNU TETSU KA LIASÜ TA ONOKI MENUNGRA BILEMTETER. NA ONOK DEN MELIACA, ANOGO ADOKABEN NÜ TEMEIMJI ONOK DEN LIR TA ONOKI METETER. NA ONOK MULUNGJANG NUNG TETI ALITSÜ. NÜ TANÜLA TETI TESÜNEP NUNG YUJANGMA OJA.

KINUNGERTEM, TEMBARTEM, KIYONGERTEM ASER TEMEIMERTER AJAKI OJALA LT. ANUNGLA ASÜDANG YARIBA ASER SARASADEM NUNG NUNGETBA ASOSHI TEMULUNG NUNG MASEMBA TEPELA LEMSATEPER. ASEN TEBU TEMEIM TSUNGREMI NENOK MOAJANGMA!

- TANURTEM, SEMCHIRTEM ASER KINUNGERTEM

MULUNGNE O



Küm 62

Kodanga amatsü makokba temeim obala asür **Wb. Kikatamba Longkumer** (Kinunger), 12th May 2021 anogo nung iba akümüli wadang tembanger, onok mulungjang zürepa, mangyim jashi nung alidang kija, kibongtem, Arogo lokti tentet balala nungi shirnokisa nübu, rongsen aser tamang sarasadem nung yaritepogo, nenok ajak dang pelaba lemsateper.

Onoki nenok ajak tenüng teta pelaba meshitetba atema sasar. Saka nenoki temeim sayuba mapatem onok mulung nung teti alitsü. Tulusang Tsüngremi nenok ajak moajangma ta ozü sarasadem.

Temeim Kinungtsü, Jala, Jabaso, Kinunger aser Anükapangtem.

Anezüka Ogo Saka Mamangteter



Late Shilukaba Ao

Aso : 02/09/1958 - Asü : 12/05/2021

Onok dang teti meima aneb-alua aliba Tsürabur, Asür Shilukaba (Molungyimsen), na milia ka, nü temeim aser nü mapa tajung, nü sayu tajung, inyaksangshi onoki kodanga mamatsü, nü dak aketba jakla tajungji onoki sobur, nüburtem den akümüli liyonga aotsü.

Onoki na menungrar aser mamar.

Temeim kinungtsü, jabaso, jala, apang aser kinunger.

ADVERTISEMENT OF APPOINTMENT

ASSAM RIFLES HIGH SCHOOL, MOKOKCHUNG 23 AR C/O 99APO (AFFILIATED TO CBSE)

The following post are vacant in Assam Rifles High school, Mokokchung

S.No	Name of Post	Minimum Qualification Required	No of Post
01	Science Teacher	MSc/BSc,B.Ed (Experienced Teacher Preferable)	02
02	Maths Teacher	MSc/BSc,B.Ed (Experienced Teacher Preferable)	02
03	English Teacher	MA/BA ,B.Ed (Experienced Teacher Preferable)	02
04	Social Science Teacher	MSc/BSc,B.Ed (Experienced Teacher Preferable)	01
05	Art Teacher	BFA in Art Education (Experienced Teacher Preferable)	01
06	Primary Teacher	MA/BSc/BA, B.Ed/JBT D.El.Ed (Experienced Teacher Preferable)	05
07	Aya		02

NOTE:

- i) Preference will be given to the eligible candidate with working experience.
- ii) Salaries and other facilities are negotiable.
- iii) Interested candidates may send an application with complete bio-data, contact number, photocopy of all documents and passport size photographs to above mentioned address latest by 02 June 2021. The dates for written exam and interview shall be intimated separately to the candidates (Contact No 03692225162 & 9612648647)

Security Forces-i NSCN (R) telungpur ana apu

Dimapur, Monupii/May 17, 2021

(TYO): Hokolbarnü (14.05.2021) Police den Security Forces longjemer general area Rukizu - Porba Jn, Pfüterero Town mita aoba mapang parnoki NSCN (R) indang telungpur ana apu, ta sangdong ka ajanga metetdaksü.

Osang tejangja ka angazükba nung ajemdaker, Security Forces den State Police longjemer iba tesem mita aoba mapang telungpur ana ya apu aser tena ket nungi ozüing alema rakzükraktem dang amshiba document tem ngutet.

Iba maparen dak sendakba nung maneni bushisüngdangtsü atema, pua alir telungpur ana aser tena ket nungi ngutetba document ajak Pfüterero Police Station, Phek District nung agütsüogo, ta sangdong nung shia lir.

Kasa anogo, Security Forces den Police longjemer Tsumang A colony, Wokha District nungi ozüing alema temesepba mozü shibelener nisung ana pua liasü.

Osang tejangja ka nung ajemdaker Security Forces aser State Police longjemer team ka Tsumang A colony indang general area mita aoba mapang parnoki shibelener ana ya apu aser tena ket nungi sen lakh 31 alang temesepba mozütem ngutet.

Iba maparen dak sendakba nung maneni bushisüngdangtsü atema, pua alir ana den külemi tena ket nungi ngutetba mozü ajak Wokha Police Station, Wokha District nung agütsüogo.

Honibarnü (15.05.2021) Surumi - Kitsakita Road, Zunheboto District nung Security Forces den Police longjemer team kati ozüing alema yi belener nisung ana puogo. Osang tejangja ka nung ajemdaker iba tesem mita aoba mapang team-i nisung ana ya apu aser tena ket nungi sen lakh 3.8 alang yi ngutet.

Iba amala inyakyim dak sendakba nung maneni bushisüngdangtsü atema pua alir

nisung ana den tena ket nungi ngutetba yi ajunga Zunheboto Police Station, Zunheboto District nung agütsüogo.

Maneni, kasa anogo (Honibarnü) Security Forces den Police longjemer Zubza Village, Kohima District nungi ozüing alema osettsüset shibelener nisung ana puogo. Osang tejangja ka angazükba nung ajemdaker, Security Forces den State Police longjemer Zubza Village -general area lendanga ataba mapang truck ka nung Myanmar nungi meima shibelenerba osettem apu aser iba truck nung alir nisung anaprongla pua liasü. Item oset ya sen lakh 28 jungnüa asütsü ta team-i asadangteter.

Iba maparen dak sendakba nung maneni bushisüngdangtsü atema pua alir nisung ana den külemi tena ket nungi ngutetba oset ajak Range Forest Officials, Dimapur District nung agütsüogo, ta kasa sangdong ajanga metetdaksü.



Dimapur Ao Lanur Telongjem kübok Sumedem (Lengrijan) nung alir lanurtemi Covid tashidak wara nokdangtsü atema tongpang nung nokdaker sepai aser health worker-tem nem chiyongtsü kar agüja pelaba sayuba noksa nung angur. Parnoki tanü Dillai gate, DC Court charali, Borlengri artsülen aser Lengrijan council hall nung police aser health worker-tem ajurua liasü. (May 17, 2021).

Rafael Nadal-i Rome asayamung 10buba kokogo



Monupii/May 17, 2021

(Agencies): Deobarnü Italian Open final asaya nung Rafael Nadal-i world number one asayar Novak Djokovic koka iba asayamung 10 benbuba kokotogo.

Nadal-i final asaya ghonda 2 den minute 49 nung 7-5, 1-6, 6-3 agi koka liasü. Iba asaya densema tena tang tashi nung 57 ben asayaogo.

"Iba asayamung takok marnok 10benbuba ajungketba ya kanga jangrademtsüka, koba bilemdangra tamakoktsü ama," ta Nadal-i ashi. Iba asayamung akokba sülen pai ATP Masters 1000 titles 36 koka Djokovic den kasa kümogo.

"Ni 2005 küm Rome nung final nung Coria koka mezüngbuba asayamung akokba bilemteter, koba ghonda pongu asayaa liasü," ta arishi

küm 34 tain asayari ashi.

Tang agi Djokovic aser Nadal na 57benbuba asayaa liasü. Tena tatemsa 2020 küm French Open final nung asaya, koba Nadal-i straight set nung akok.

Tenati Rome nung taoba asayamung 17 nungi 15 bo kokogo aser final nung tena tsüngda asaya Nadal-i 4 aser Djokovic-i 2 koka lir.

"Ni iba asayamung kanga koknüa liasü. Iba asayamung ya kü indang career nung asayamung tongtibangtiba rongnung ka lir. Ni Monte Carlo, Barcelona aser Roland Garros asayamung 10 benben kokogo aser idakia kanga koknüa liasü," ta Nadal-i ashi.

Final asaya nung mezüngbuba service game mekokaka Nadal-i game tasembuba nung Djokovic

indang serve break süa mezüngbuba set akok.

Ajisüak tanabuba set nung Djokovic-i Nadal indang service anaben tashi break süa akok aser kasasa aküm.

Tasembuba set nung Nadal-i asendenshir asaya. Pai pa indang serve game pongububa nung break points ana tashi kümzüik aser game trokbuba nung Djokovic indang serve love nung break asü.

Djokovic-i game tibuba nung mezüngbuba match point bo kümzüiktet saka Nadal-i tanaben maangka anguba melalui asaya akok.

"Rafa den final asayatsüba dak alaka tanga tetsükdaksü tuluba mali," ta Djokovic-i ashi.

"Ghonda asem temaba jenjang nung tennis asayaogo. Makokba atema tezü adanger saka ni asayaba yimya dak temulung asür.

"Iba asayamung nung shilem agiba sülen Paris nung junga asayatsüsü ta bilemer. Ni yasüng aser tanü ama asayatera asayamung akoktsü timla lir.

"Ni Belgrade nung asayatsü aser iba sülen Paris nung oa asayatsü," ta Djokovic-i ashi.

French Open ya Paris nung May 30 nü nungi tenzüka asayatsü.

Dubai Asian Boxing: India team tang tashi visa mongui lir

Monupii/May 17, 2021

(Agencies): Iba ita Dubai nung asayatsü aliba Asian Boxing Championships nung India nung asayatem shilem agitetsü magitetsü mejangjai lir, kechiyong nisung 20 agi kümteba India team tang tashi visa monguteti lir, ta Boxing Federation of India (BFI) secretary-i Hombarnü ashi.

Iba asayamung ya May 21 nü nungi tenzüksü renema lir. India team nung tetsür asayar 10 densema lir.

"India tetsür aser tebur boxing team Dubai-i aotsü atema tang tashi visa monguteti lir. Onoki takok tashi team yoktsü atema inyaktepdar," ta

BFI secretary Hemanta Kalita-i IANS dang ashi.

Mezüngbo iba asayamung ya New Delhi nung asayatsü renemer liasü, ajisüaka taoba ita Asian Boxing Confederation-i Dubai-i belener aotsü telemteba agi, kechiyong India nung aser talisa Delhi nung covid wara kanga mejungi pokteter lir.

India nung Covid-19 tensa tamajungba dang kümyonga aoer asünung BFI-i Asian asayamung achaayangtsü atema staff tem dena meyoktsü akok.

"Iba asayamung ya longjemer ayongzüksü sentong yanglu asünung Dubai-i ketdangsurtem yoktsü sentong

liasü saka tangbo kecha mali. Tensa tetsübuttsüka aser India nung ketdangsurtem aotsü imlaa matar," ta Kalita-i ashi.

Tebur team Patiala indang National Institute of Sports nung training agidar aser tetsür team indang camp May 5 nü Army Sports Institute, Pune nung tenzükogo.

BFI-i, Pune camp atema tetsür boxer 10 shimogo, saka parnok rongnung pongu dang anogo ishika tejakdanggang camp nung arua shilem agidar.

Tetsür pezü densema boxer teku Olympic Games atema qualify süogo, koba Tokyo nung July 23 nü nungi tenzüka asayatsü lir.



Gothenburg, Sweden nung UEFA Women's Champions League final nung Chelsea FC goal 4-0 agi akokba sülen FC Barcelona nungi asayatem takok marok bener pelatepba noksa nung angur.

Archer New Zealand den asaya nung masayatetsü

Monupii/May 17, 2021

(Agencies): England pacer Jofra Archer, shiba tekatsüla yiruba ajanga IPL nung masayatetsüsa aküm, pa New Zealand den Test asayatsü aliba nunga mezüngoksem, kechiyong pa tekatsüla ano tanaben yirushiogo.

Arishi küm 26 tain asayar ya pa indang County side Sussex nungi Kent den asaya, saka ball over pongu dang anoba sülen masayatetsüsa aküm.

Iba asaya nung shilem magi tsüngda pa taoba hopta Surrey dena asayaogo. Iba asaya nung pai over 29.2 ona liasü.

"England aser Sussex seamer Jofra Archer, taruba ita nungi tenzüka New Zealand den LV= Insurance Test Series asayatsü aliba nung masayatetsü," ta England and Wales Cricket Board (ECB) sangdong ka ajanga metetdaksü.

"Pa ball aonba mapang teka tachichilen tekatsüla ashiba ajanga ball montetsüsa aküm," ta kasa sangdong ajanga metetdaksü.

Archer-i pa New Zealand den June 2 nü nungi tenzüka asayatsü aliba Test nung asayatetsüsa temang junga kümogo ta ashi, saka pa tekatsüla tanaben raksashiba ajanga pa aser ECB sentong nung tetsükdaksü adokogo.

Cricket board-i tang Archer surgery agitsü magitsü agi bilemdangdar.

"England aser Sussex medical team temi mongintem nungi shisatsü agitsü, aser Archer iba hopta tatemlen medical consultant ka den ajurutepa taruba jenjang atema telemteba ka agitsü," ta ECB sangdong ajanga metetdaksü.

India den Test asayaba mapanga Archer Test ana dang asayateta liasü.

Pa tekatsüla anepalutsü atema IPL nung shilem magitsü telemteba agi aser iba sülen pa teka tachichilen ango metsüba pongdang merekba mapang rangoka aliba glass agitsü atema surgery agi liasü.

New Zealand series atema England squad Mongolbarnü sangdongtsü.

North Korea FIFA 2022 WC Qualifiers nung shilem magitsü

Monupii/May 17, 2021

(Agencies): North Korea-i taruba ita asayatsü aliba 2022 World Cup qualifier nung shilem magitsü telemteba agiogo, ta Asian Football Confederation-i Deobarnü metetdaksü.

"DPR Korea Football Association-i, FIFA World Cup Qatar 2022 atema Asian Qualifiers nung shilem magitsü telemteba agiba Asian Football Confederation-i tanü jangjatsür," ta AFC sangdong ka ajanga metetdaksü. Asayamung nung shilem magitsü atema telemteba agiba kuli kecha magitsü, ajisüaka South Korean media sangdong balala ajanga iba ita tetenzüklen, coronavirus tashidak tsübuba ajanga Pyongyang-i qualifier nung shilem magitsü ta shiogo, ta metetdaksü. Covid-19 wara ajanga Qatar World Cup atema Asia preliminary tournament tanabuba round June ita-i belener aotsüsa aküm.

AFC-i taoba ita, parnoki asayamung asayayimya melenshitsü, ajita asünungdang linük pongungu agi kümteba telok balala ajak linük ka nung dang asayatetsü, ta ashi. Group H asayatem ajak

South Korea nung asayatsü shimogo. Iba telok nung Turkmenistan temaba jenjang nung lir aser Korea ana den Lebanon aser Sri Lanka densema lir.

North Korea team Asian qualifying Group H nung jenjang pezübuba nung liasü, ajisüaka asayamung nungi matsüngin tsüngda asaya asem asayatsü anunga lia parnok Group H nung lenir Turkmenistan dang nungi point ka agi dang tajemba liasü.

FIFA indang organising committee den ken o angatettepba sülen Group H dak sendaba nung telemteba ka agitsü, ta AFC-i ashi.

Iba asayamung ya 2023 Asian Cup atema-a qualifiers asayamung ka lir, koba China nung asayatsü.

Wara pokteter aliba ajanga tebilemstü kaa Tokyo Olympics nung shilem magitsü ta sangdongba sülen ita ka shi lir tang Pyongyang-i WC qualifier nung shilem magitsü telemteba agiogo.

Taoba küm wara pokteterba sülen linük shibanga ayuba linüktem rongnung North Korea mezüngpurtem rongnung densema liasü.

BILEMDANGANG

"Teküküm nisung lendong nungi jenboa alir."